

աջ և ձախ ձեռներով բռնած՝ ղեկավարում է գործիքը: Մաճի հիմքի մոտ առա-  
տամին միանում է երկար բազուկը, որը շարժական է, կարող է մի փոքր  
բարձրանալ և իջնել՝ լայնացնելով կամ նեղացնելով առատամի հետ կազմող  
անկյունը, նայելով, թե որքան խորը պիտի ակոսի խօփը: Մեկ անգամ սարք-  
ված անկյունը անփոփոխ պահելու համար առատամի վրա, առատամի եր-  
կու՝ սուր և բուժ ծայրերից հավասար հեռավորությամբ կանգնեցրած է բուրձը՝  
որոշ բարձրության վրա փորած ծակերով: Այս ծակերի մեջ անց են կացվում  
թրթի գնդաներ՝ փոքրիկ ձողիկներ, բազուկը ցանկալի բարձրության վրա ամ-  
րացնելու համար: Բազուկի միջի մասում քառանկյունի նեղ ծակը՝ պօրտի  
տեղը կտրված է նրա համար, որ մեջը ամրացվի այդ ծակի հաստությանը  
համապատասխանող փայտե կտորը՝ պօրտը, իսկ ծայրին ավելի մոտ կտրված  
են երկու կօրծավարի ծակերը, որոնք կօրծավար կոչվող փայտիկներ անցկաց-  
նելու համար են: Մաճի հիմքում առատամի վրա բազուկի տակ, դեպի աջ և  
ձախ, շեղ ամրացված են անգամներ: Կօրծավարի վրա ձգվում է փայտե օղակ՝  
բօսա՝: Նրա օգնությամբ կաշվե ջօլավ՝ փոկով ամրացվում է առաջին զույգ  
եզների լուծը: Պօրտի տեղից կապվում է երկաթե շղթան, երկար զինջիլը,  
որից քաշում են երկրորդ և երրորդ լուծ եզները: Ալաթին երբեմն լծվում են  
առջևից նաև չորրորդ զույգ եզներ: Առաջին զույգ եզները կոչվում են ամբուլ  
կամ ամբլայեզներ<sup>4</sup>. երկրորդը՝ ուսածէբ, միջի յեզներ կամ միջի ջուխայեզներ,  
երրորդը՝ առաջիկ կամ ըոչնայեզներ. չորրորդը՝ մրդրատօն կամ մարթուակ:  
Սովորաբար լծվում են երեք զույգ<sup>5</sup>: Եզները լծած, կազմ ու պատրաստ արորը  
կոչվում է վէսկի<sup>7</sup>, մի բառ, որը ոմանք համարում են վէցկի, այսինքն վեց  
ևզը լծած արուբի բառի աղավաղում:

Մաճկալին Բեխ գյուղում ասում են ունչպար: Եզներ քշողը հօտաղ է, թփեր  
հեռացնողը՝ ֆօլ անող, թօխրայօլ մեծ ճումերն ու խոստակները ջարդողը՝  
թօխրատու:

Քանի որ ոչ ոք չէր ունենում և՛ արոր, և՛ անհրաժեշտ թվով լծկան, մի  
քանի հողատերեր միանում էին արորով ու եզներով և ամբողջ վարի ժամա-  
նակաշրջանում դառնում էին վէսկի-հրեզերներ: Այդ հրակաշուրթյան<sup>8</sup> կամ  
հրկշվէի<sup>9</sup> ժամանակամիջոցը բաժանվում էր մասնակիցների միջև ըստ նրանց  
եզների թվի, արորը հաշվելով մի եզը<sup>10</sup>: Եզ չունեցողը դառնում էր ճրպօտ  
հօտաղ, որը մեծ մասամբ զբաղված էր լինում վարը թոխրելով: Բանվորները  
կերակրվում էին վարի ժամանակ այն մասնակցի հաշվին, ում հողաբաժինը  
վարում էին: Տոն օրերին կերակրվում էին իրենց հաշվին, իսկ գիշերվա հո-  
վիվը՝ խօփի, զնջիլի և ջօլօթի տիրոջ հաշվին:

Սերմացուն փոխ առնել չէր կարելի: Պետք էր անպատճառ փողով գնվեր:  
Միայն սերմով մասնակցել նույնպես թույլ չէր տրվում: Անպատճառ պետք էր  
աշխատանքով ևս մասնակցել, թեկուզ որպես թօխրատու:

<sup>4</sup> Սրսիանում՝ կանդրիվ:

<sup>5</sup> Արծվանիկում՝ բմբլա:

<sup>6</sup> Բռնակոթ:

<sup>7</sup> Արծվանիկ:

<sup>8</sup> Լեռնային Ղարաբաղ:

<sup>9</sup> Կապան:

<sup>10</sup> Իսկ եթե զուժանով էին վարում, զուժանին հաշվում էին 6 օր (մանկալավ), մեկ եզանը՝  
մեկ օր, մեկ մարդուն՝ 2 օր (Բռնակոթ):